

XXVII. Cæterùm si Revelationes quædam sese offerant de aliis rebus, quæ homini cuidam, vel universæ Ecclesiæ, ut compleantur vetera vaticinia, peculiariter sunt eventuræ? vel si de bono quodam antea nobis incognito admoneamur, & quæ sunt similia in talibus quidem rebus non penitus negamus, quòd Deus, quamvis ordinariè non ampliùs nobiscum per immediatas revelationes agere velit, neq; tales petere & expectare jubeat; ex sanctis tamen & nobis ignotis rationibus adhuc possit ejusmodi extraordinariè concedere. Sed tamen dicimus, eas, quia falsæ à veris difficillimè dignoscuntur, ideoq; quæ obveniunt, periculosæ haud rarò & perniciosæ existunt, non statim pro divinis esse habendas, aut æquiparandas illis, quæ ante constitutum canonem in N. Test. Apostolis aliisque fidelibus contigerunt, sed potiùs probandas, nùm ex Deo sint. Hoc enim vult S. Johannes, quando I. epist. IV. 1. dicit: *Probandos Spiritus*. Hoc itidem vult Apostolus Paulus, *ut omnia probemus, quò quòd bonum est, retinemus*, I. Thess. IV, 21. ne diabolus, qui sæpius in Angelum lucis se transformat, nos decipiat, & in animæ pariter ac corporis discrimen nos adducat. Cautè igitur & prudenter hæc semper sunt considerandæ, præsertim his nostris temporibus, de quibus Christus jamdudum *Matth. XXIV. 24.* prædixit: *Excitatueros Pseudophrophetas & editueros signa magna, ita ut seducant, (si fieri possit) etiam electos.* Quod quidem monitum benè observari oportet, ne seducamur, aut ab ordinariâ Christi viâ ad novarum revelationum semitas nos deduci patiamur, neque etiam verbis eorum, licet primâ fronte ad pietatem, pœnitentiam, & morum commutationem hortari nos videantur, statim assensum præbeamus, sed ut firmiter adhæreamus effato illi Petrino, II. ep. I. 19. *Habemus firmissimum illum sermonem propheticum, ad quem benefacitis, quò attenditis, velut lucernam splendens in obscuro loco, usq; dum dies illuxerit, & lucifer exoriatur in cordibus vestris.* Atque hoc etiam contenti sumus. Nunc verò colophonem huic nostro exercitio imponentes, Deum Triunum supplici rogamus prece, velit ipse nos in veritate suâ constanter conservare, ac per eandem omnes ac singulos salvare, cui Soli sit Honor, Laus & Gloria in Secula Seculorum. Amen!

Coll. diss. A 4, misc. 18